



# CONFORMISMO CU MEDIOCRIDAD

UN COMBINACION FATAL PA UN SOCIEDAD DINAMICO

**E**famoso científico cu a desaro a teoría di relatividad (1905) Albert Einstein den un di su dichonan a bisa: "Highly developed spirits often encounter resistance from mediocre minds".

Sociedadnan na mundo hopi bes ta hiba e lucha pa ta un sociedad dinamico. E sociedad aki ta trata na un forma creativo, disciplina y structura mantiene su competitividad riba e mercado internacional. E dinamismo aki den cuallier sociedad, tin bes por wordo stroba of stagna pa motibo di conformismo.

**Kiko nos ta compronde cu conformismo?**

Conformismo ta e proceso na unda actuacion di hende ta ser influencia pa otroonan. Conformismo ta wordo describi den literatura como e suspencion di e auto determinacion di un individuo, na favor di obediencia y convencion. Entrega di bo autonomia na un cierto grupo di presion of na un autoridad superior. Locual cu esaki ta trece cu ne ta cu e creatividad y individualidad ta keda oprimi.

Conformismo no necesariamente tin un conotacion negativo. Tin bes cu hustamente conformismo ta loke ta hiba un sociedad na ordo. Reglanan skirbi of reglanan generalmente acepta ta keda respeta.

Señora Amparo Chantada cu tin un PhD den ciencia humano, y ta profesora di Universidad na Republica Dominicana ta describi e conformismo den un forma hopi cla. E ta muestra e efectonan negativo cu conformismo tin riba un sociedad. E ta describir tambe como un plaga. E ta describir como lo siguiente:

*El conformismo social es un comportamiento colectivo inhibitor de la conciencia, y limitador de la voluntad, que termina en un estado de autocomplacencia. Se razona parcialmente, en el caso de que se razone. El conformismo social crea una sociedad de cobardes, de satisfechos, de sumisos, para no poner en peligro su estatus quo. Permanecer estático, sordo a la realidad, siempre es mucho más sencillo y placentero, evita problemas y nos dota de un aura de ecuanimidad y decencia burguesa, que nos granjea aceptación y muchos amigos en academias, en fiestas y en el trabajo. Los sistemas políticos de facto crean*

*un conformismo social, más penoso es que se transforma, en algunos casos, en cultura.*

Ora cu un sociedad perde e estímulo pa ta auto-critico y en cambio ta conforme cu e average, e sociedad aki nunca lo resalta riba su mes. Conformismo pa definicion ta contrario na creatividad y alabes di liderazgo inovativo. Hopi bes e proceso aki ta ser stimula dor di gobiernonan autoritario.

Na momento cu e termino **conformismo** ser mescla cu **mediocridad** esaki ta crea un formula cu tin como destino negativismo, stagnacion y problema. Na momento cu un sociedad ta conforme cu un proceder mediocre di su institucionnan, di e funcionamiento ineficiente di su sistema, cu lidernan politico y sindical incapacita y inapto, cu productividad abou di servicionan, cu resultadonan mediocre den deporte y educacion, e sociedad lo ta den e rumbo di decadencia.

E proceso aki por bay asina leu cu na cierto momento esaki por bira custumber. Na momento cu e sistema desaroya su mes asina leu cu e sociedad no con-

oce algo mihor, individuonan den un sociedad ta hiba un bida cu ta "OK", ora nan ta sigui ciegamente tras di un lider, ora nan ta usa un vocabulario cu terminonan manera "mi ta spera" enbes di "mi ta bay logra", ta cana tras di otro hendenan, sin ta suficiente critico of tin e nocion di cu nan no tin e oportunidad pa logra cierto metananan y yega na logronan grandi den nan bida, e sociedad aki ta den un fase di mediocridad sistematico. Na momento cu situacionnan bou di hobennan den un sociedad ta constantemente den lus negativo, cu bo economia ta conoce un inflacion barbaro, cu personanan no ta reconoce cu ta bo **derecho** pa critica esaki, cu un sociedad ta acepta y tolera comportacion inadecua di su autoridatnan y su lidernan politico, sin tuma accion contra esaki, ta un prueba cu bo sociedad a yega den e estado di *conformismo cu mediocridad*.

Hopi bes nos por tuma nota di declaracionnan na unda lidernan politico ta compara nan mes cu esnan menos malo, of compara desaroyo di Aruba paisnan menos desaroya. Esaki ta un señal di conformismo politico. No pone metanan grandi y mira tur cos como mucho dificil ta otro señal di falta di liderazgo inovativo. Un maneho mediocre ta na momento cu bo sa cu algo no ta funcionando bon y bo no ta haci nada pa mehora esaki. Sin prepara un plan concreto pa cambia

e situacion den un termino acorda. Na momento cu bo ta papia di *'constant underperformance'* ta loke ta hasi un proceso, mediocre. Mediocridad ta na momento cu bo ta sigui un cierto rumbo pre-determina sin ta critico.

Un bon ehempel cu pakico ta importante pa ta critico ta nos historia di Status Aparte. Ban supone cu Aruba hamas lo tabata critico riba e constelacion di Reino Hulandes prome cu 1986. Ban supone cu e Arubiano tabata conforme cu e status di Aruba den Reino Hulandes. E posicion mediocre aki sin duda tabatin su efectonan pa cu nos desaroyo. Si nos a mantene status quo, Aruba nunca lo ta na e nivel di desaroyo economico cu awe e ta disfruta di dje. Te awe ainda, nos derecho di autodeterminacion ta brinda nos e posibilidad pa tuma decisionnan autonomo, na momento cu ta trata di asuntonan interno di Aruba.

Tur esaki tabata danki na e esfuerso y trabou duro di lidernan politico cu no tabata conforme cu e situacion den e tempo ey.

**Con bo por descurasha mediocridad den bo sociedad, compania of bo pais?**

E contrario di mediocridad ta excelencia. Excelencia ta existi lo mihor di tur cos y haci lo necesario pa logra haye. Exigi e mihor pareha y e mihor trabou cu e mihor pago. Forsa e compania na unda bo ta labora pa traha e mihor producto pa su clientenan. Excelencia ta existi e mihor di uno mes. Exigi di bo gobernantenan y politiconan un excelente nivel den politica. Excelencia den politica ta e cura pa e plaga cu yama

conformismo cu mediocridad.

Ser un leader den tur aspecto di bo bida. Crea bo mesun caminda den e mundo aki. Trata na ser un individuo cu ta resalta den tur cos cu bo ta haci. No hiba bo bida pensando kico otro hende ta pensa of preocupa con bo ta muestra. No lubida cu nos tur ta pecador y por haci eroman. Trata na biba un bida cu posibilidadnan cu ilimita. Semper trata na siña y haya experiencia nobo. Sigui move pa dilanti. Tin semper confiansa, sea fuerte y tin curashi. Tuma responsabilidad di bo bida y haci un diferencia den bida di otroonan. Stimula debate cu contenido. No acepta of custumbra cu e "average".


Hopi pais na mundo ta concentra riba e aspecto di stimula hovenan pa ser mas competitivo y logra lo mihor di nan mes. Un pais manera India tin un creciente competencia pa excelencia educativo. Esaki ta locual ta stimula personanan pa pone metanan mas halto den nan bida. Un bon plan y mas inversion den educacion lo tin efectonan positivo pa desaroyo di bo pais. Paisnan manera China, India y Europa ta sigui den crecimiento economico dor di inversion den nan calidad di educacion.

Un sugerencia pa nos na Aruba, naturalmente ta mas inversion den enseñansa y tambe den deporte. Como un pais den desaroyo y tambe como un pais chikito, e lineanan di contacto ta mas corto, locual ta hacie mas facil pa directamente ta den contacto cu hovenan y trata na stimula nan pa sigui e caminda pa excelencia. ■

**We must overcome the notion that we must be regular. It robs you of the chance to be extraordinary and leads you to the mediocre**

Uta Hagen

*\*Drs. Paul F.T. Croes, a gradua na Universidad di Amsterdam na Hulanda, den ramo di Sciençianan Politico cu specialisacion riba Relacionnan Internacionales. Actualmente e ta trahando como Consehero den e Division Politico - Economico na Departamento di Relacionnan Exterior. Alaves Paul ta Secretario di Fundacion Formacion Politico Digna Lacle - Herrera.*



"Everything should be made as simple as possible, but not simpler."

Albert Einstein